

彭澤縣志卷之十

列女 孝 賢 貞 烈 節 壽 五代同堂



天地靈秀之氣鍾於男子亦鍾於婦人閨門
間何知學問而溫厚慈和堅貞柔順或冰霜自勵終
身不渝或激烈捐軀慷慨赴義此皆本乎天性有爲
士君子所不能及者故易占貞吉詩咏柏舟春秋紀
宋姬敬姜彤管光於一時遺芳垂於後世所以敦彝
倫勵風俗也彭邑克敦闡範足爲坊表者前後相望
臚列而續編之斯亦維持風化之大端也志列女
孝

明

計如垣妻德清縣君朱氏輔國將軍拱挺女垣念寡母欲
辭祿歸養縣君忻然相從執婦道甚恭一日垣外出盜
卒至劫姑家人失措縣君盡出簪珥以脫姑於難姑遭
疾篤縣君籲天請代姑尋瘳與垣相敬終身卒賜諭祭
嗟乎父子天性篤孝尙不概見况婦姑乎至出自宗藩
不貴倨習而賢孝聞抑又難矣故首錄之以風閭德云

國朝

增生周九成妻宗氏秉性和淑嬪周門克盡婦道舅孝廉
易元卒於官姑痛夫亡長齋綉佛氏亦斷暈對食姑又
多病氏親奉湯藥十餘載終始弗懈姑亡夫亦旋卒氏
年三十廿貧教子卒以成名享年八十有五

生員計應卜妻朱氏東流縣生員應試之女卜以家貧爲
贅媪朱念舅姑在堂不獲躬親服侍哀懇父母從夫歸
養盡裝資以奉甘旨生事死喪始終如一子息維艱族
人屢爲祝神求嗣晚舉一子名汎愛是亦孝德所感
何氏東流縣何一仲女年十三母病篤暗禱求代已而割
股母疑問解以他故卒不明言長適邑人劉萬流能修
婦道年八十有九而康健不衰曾元繞膝其錫類然也

賢

國朝

廩貢生王心約次妻朱氏明弋陽王女賦性溫惠年十六
下嬪紡績佐讀事公姑以禮裙布釵荆不尙華飾雖出

自宗藩毫無驕態

職員高 趙妻朱氏幼嫻女誡秉性溫柔主持家政嚴而有禮夫歿子喪撫諸孤教之成立壽八旬邑令宋若臨贈以德門壽母媳邵氏比德於姑事姑孝雖早逝而族黨至今稱賢

監生王增大妻周氏德性柔順頗通女史歸王克執婦道事舅姑從無逮色疾言生一子已成名每慮夫嗣未廣勸娶庶室者二庶室俱沒各遺孩方數月氏撫之無異已出里族咸稱爲賢德

高士曾妻歐陽氏性端莊家素清苦履之若亨夫臨終以教子爲鵲涕泣受命躬勤紡績玉子成名克承夫志知

縣吳會川給以副徵畫苑匾額

監生畢增紱妻歐陽氏性和淑不妬忌幼在母家喜讀內則諸書及于歸孝翁姑敬夫子克盡婦道年三十舉子弗育卽向夫曰不孝有三無後爲大君曷早爲計紱納庶室產二子氏親鞠育之恩勤備至稍長則教以禮讓戒之慎交遊其思深慮遠有丈夫所不及者

以上舊志

郡庠生張兆旂妻馮氏旂沒時四子俱未成立母以十指作生計劬勞備至子繼考差長諭以父志篝燈課讀年十九補博士弟子員令授諸弟業漏三滴猶紡績以待勤者以食物獎之諸子益勵於學躍考光考相繼入泮命往白鹿洞遊中丞廣昌魏公之門魏公問母賢教益

切乾隆己卯科光考中副車次年捷於鄉母爲次子惠
考授例入太學曰吾所以必合成名者非以爲榮恐汝
父有餘痼也哉辛卯光考選授龍南教諭母每以書誡
之曰此非冗員也顧名思義當爲

朝廷造士其母忘昔之所以教汝者邑人士交口頌之謂
陶母歐母俱在江右得此而三矣晚年諸孫林立猶諄
諄訓第九孫錦枝尤鍾愛卒年八十有八已

勅封太孺人矣旋以孫錦枝官

晉封太恭人

進士汪 持妻柯氏年十七歸持持性孝氏能體夫意以
承順舅姑舅姑善之持益加敬焉生子五後持會試留

京師氏摒擋家務延師課五子故持留京二十餘年而
家事優裕諸子成立皆柯之力也氏性不善華飾家素
豐朴素自守惟以紡績率諸婦機燈圍坐述古孝順事
津津然每諸孫進見必課其學業學有進則喜形於色
啖以菓借此勵彼勸誡多方凡親舊中有拮据者必隨
分資補雖捐釵珥弗計故其慈惠尤爲鄉黨所稱

儒士張錫重妻劉氏歸張生三子承舅姑命以次子澤綿
出繼不幸長幼早逝夫又以勤學成疾年二十七而卒
時有語及退繼者氏曰此事久定未易更也母妄言傷
舅姑心吾俟澤綿生子以延吾宗自重沒後孝養益孳
見舅姑涕泣且含淚慰之恐損衰年及二老相繼沒氏

痛苦悲哀濱死者數念宗祧未延家務繁重遂忍死持家勤苦節儉備歷艱辛因鬱成疾綿以醫藥進却曰汝宜自愛母爲余慮也後綿生三子卽以長名選峯者歸宗奉祀氏延師訓課屢遷郡尊邑侯識拔他如憫貧矜厄推解弗吝鄰里稱之卒年八十有一

監生楊植妻張氏性貞靜有禮而多才初植嗜學家務

一委諸氏氏拊搗一切內外井然以故植得卒業爲通儒中年產多弗育勸夫娶妾輒繼以泣後連舉三子教

以義方每諸子夜讀氏樂聞書聲恒達旦不寐仲期季

露皆著聲庠序凡四方知名士過訪殷懃款待有陶母

風性尤好施予家中貧乏者常量調給衣

食喪葬重事雖脫簪珥相濟弗惜也自奉極儉衰邁時子嘗勸衣裘帛氏輒拒曰自予歸汝父後裙布荆釵安之已素奚用此侈靡者爲待下慈惠交至御減獲葦亦無疾言遠色歿年九十有六人咸謂氏壽陰陽延之

太學生張澤綿妻汪氏附貢生拱垣母也敬養孀姑歷久不懈夫年三十疾篤氏默禱神前願以身代夫歿子幼總理家政內外肅然建立學舍延師課子又於屋側張家堰捐貲造橋以濟行人好善樂助鄉里貧困者咸賴之享壽七十有七眼見孫曾林立咸謂累世節孝所感云

太學生扶隆甲妻項氏幼嫻內則于歸後克盡婦道自奉

儉薄而款賓則極其豐潔有陶母之風焉性仁慈遇困苦顛連者解推毫無吝色佐夫訓子嚴慈並用男承清弱冠入邑庠有聲學校皆氏督責之力也甲忠篤疾氏侍奉湯藥衣不解帶夜不安枕歷十七載不懈毫無怨言鄉里同聲賢之

貞

明

丁文理妻饒氏克恭婦道文理疾貧無藥餌饒顯天封左肱煮湯飲之卽瘥繼病熱悶亂復封右肱和藥以療不踰年又病噤飲食醫藥不進又顧天封左臂飲之而進食漸復故

歐陽國禎妻丁氏歐納聘後家漸貧落氏父強改聘遂破面誓死父誘媒將病瘦男子詐爲禎欲以移其志卒弗克遷延至二十許知其志不可奪乃許完姻合卺之夕見禎貌反疑爲僞不肯成婚良久得實方諧伉儷貧窶沒齒終無怨言

畢娥餘姚合丁嘉臣之媳也自幼締婚年九歲丁子故誓不再適十二歲父母爲娥擇配受聘日給娥攜弟往伯叔家伯叔母爲娥道喜娥默不語歸而自縊丁聞具公服親往奠焉以上舊志

生員毅女洪氏毅老無子視女如男每教以大義時女尙幼便往往以古名媛自命監生項錦聞而奇之爲子宗

璉聘焉既而女之父死女哀毀如成人女自受聘於項
每聞項家生辰忌日必齋於家其母知而賢之贊曰好
女兒爲賀項郎得一賢婦後母病女割股療之及筭未
嫁而璉故女聞跪請於母而泣曰兒無兄弟兒願侍母
終身然母嘗謂兒爲項家賢婦兒欲踐母言歸於項遂
以吉服往見舅姑於堂上見畢易衰而號項之族人聚
而觀之咸泣下自是日居樓上不與人接見越數年璉
兄宗昭誕次子佺以繼璉嗣女乃釋衰服設祭泣於璉
靈曰我前以吉服見翁姑於堂上媳之始今請以吉服
見郎於地下妻之始郎今有子繼繼承承永郎祀於不
替我是女兒身可堪母人乎請從郎言畢以首觸地血

被面姑力挽之得不死後數月竟以憂卒臨終囑勿以
男子殮殮時年二十六現詳請 旌表

詔允建坊

柯仲旭女名長姑性溫良善女工守貞不嫁父母抱疾朝
夕服事衣不解帶及衰老出入扶持不離須臾親歿一
切殮葬之事悉親自檢點哀痛悲毀卒以成疾而終族
姪孫教諭友桐贊曰婦以節稱者世多有之而貞女恒
少非無貞女也易曰十年不字之貞固難至終身不字
則尤難自北宮嬰兒後於姑復見趙威后云徹其環瑱
至老不嫁以養父母是率民而出於孝情者也若姑者
倘亦聞其風而慕效之者歟

朱秉謙之女三姑年十五未許聘父母俱喪上無長兄有弟源和甫二歲家貧撫養無人三姑毅然以撫弟為己任遂不字有勸嫁者必慟哭父母指弟而言曰此孤無託余豈為身計而危父母之宗祀耶躬親勤苦延師課弟又為弟娶婦完婚主持家政內外無間言守貞六十歲而終至今源和子孫蕃衍矜貢相接皆姑之力也太學生何殿甲女何媵故郡庠生方颺風聘室也祖顯乾隆辛未進士女夙嫻禮教自幼言笑不苟稍長足不履外庭雖戚屬罕有見其面者年數歲許聘方未嫁而方染篤疾女母往視數日未歸遂相傳為已死女聞之謂其嫂曰母胡不歸嫂嗚嗚不即答女以為真遂託澣衣

而自沈焉時年十七

增貢生楊作舟女的媵許字前任直隸霸州知州邑人凌鳴盛長子十五歲時聞凌故誓不改字父母亦不忍奪其志踰八年卒於母家

何貞妹許聘畢鴻舉年十三畢門接為養媳鴻舉抱病淹延四載尚未完婚舉亡女守貞誓無二心不忍離姑克全孝道和娣姒勤織經歷久不懈伯叔嘉其貞操立姪繼香為嗣現年四十九

烈

明

歐陽尚八妻李氏尚誠弟婦也先是洪懸作亂尚誠面奏

太祖平洪後其黨復訃李謂其妾曰洪黨不殄我家必
被其害母爲所辱遂閉門自焚死

庠生馮士翼妻丁氏給諫丁湛孫女歸馮踰年夫亡止遺
一女姑王氏孀居丁觸棺碎首幾斃復甦遂忍死養姑
撫女素性貞靜閨闈不踰家貧紡績爲生事姑至孝姑
病刲股和劑俟姑歿女嫁丁曰吾事畢矣未亡人何用
生爲乃觸夫塚而死其女葬諸南石峯巔婿之山也去
馮塋數十武許墓上生木枝葉悉東向指馮塋閭邑異
之

計偉越妻劉氏年十八歲適計五載夫亡哀痛殊切圖與
俱死旣而翁舉夫喪劉泣告願少留乃別築室停之劉

苦塊以居悲號傷心嘔血數升父母恐遷柩藁葬劉曰
吾今得死期矣遂不改哀經七日不食而卒舉其屍見
袖中所遺巾帨皆夫之遺物

許近萬妻查氏年三十無子近萬病革氏謀殉之乃暗懷
砒霜於身近萬卒卽吞之毒發死

劉健恒妻畢氏于歸一月而夫亡孀守堅貞歲乙酉左帥
叛兵欲汚其節畢罵賊自殺邑令董襄追獎其烈

王秉陽妻洪氏梓潼尹維幹女桂林守演疇媳也左帥叛
逆南下猖獗避陶潭鄉遇賊欲掠去洪諍之曰吾父何
人吾翁何人汝敢辱我乎連罵死賊賊斷其臂至死猶
罵聲不絕時南操撫黃配元道經彭邑聞其事傷之曰

不從賊節也罵賊而死烈也節與烈兼不愧梓潼洪尹矣

庠生陳力妻饒氏名蘭左兵叛蘭避聶家山爲亂兵所掠欲擁之去蘭罵不絕口賊怒磔之

國朝

胡文光妻江氏秉性淑慎及笄適胡甫三歲而胡下世家貧無子卽欲自刃姑老無倚勉強奉姑及姑沒日吾事畢矣遂入室更衣投繯而死邑令李松泰具詳其事建坊旌表

陶得要妻陳氏適陶五載夫得重疾家極貧將鬻氏倩醫氏泣曰若食盡割肉錢疾弗愈誰侍湯藥吾寧死一團

決不作他人婦中間丐食爲湯藥資歷三年夫死氏念身寡叔鰥兼無嗣義有死無二待夫柩歸山夜投井死至今每歲屆氏死月井必涸邑人何顯有詩致弔豈直夫亡誓柏舟生同艱苦死同休三年補就雲山恨勺水洗清天地羞徑取藥鑛煨鐵骨願從井穴瘞骷體綱常幻出淒涼景泣飲寒泉竭不流

汪鑑祥妻陳氏年二十三夫故生一子又亡繼姪進祿爲嗣撫若己出經營家務衣食頗充時有利其所有者逼之改嫁氏曰婦人事夫理無再醮禽獸之行吾豈爲乎爰引針縷衣抱姑與夫二靈於懷自縊而死嗟乎繁縷衣恐露體也可謂知禮矣抱二靈不忘至也可謂守義

矣夫慷慨捐軀猶人所難况若斯之從容以殉者哉維時邑令李祖旦聞於上臺巡道劉均旌以節烈可珍匾額邑人歐陽恭詩以弔之綿綿愁緒線添長一淚一針一斷腸縲首低徊親骨肉翁姑尋罷又尋郎

汪焜漸妻劉氏出自宦門克執婦道康熙壬子夫爲盜所劫劉冒刃救護不避死亡盜舍之夫以創死氏年廿三痛夫死非命誓必報讐破產鳴官盜卒盡獲巾幗有烈士之風以上舊志

何雲才妻鄭氏年十七歸何佐何理家躬自操作有孟德曜風雲才病氏侍湯藥日久不懈比死號泣欲絕泪盡繼之以血越三日夫葬氏抱孤視之語葬者曰善爲之

不久吾當共穴既歸向其夫靈前焚楮作禮呼妯氏王至中堂歛衽再拜以孤託焉衆防之至夜稍懈竟闖戶投縲而死時年二十有六

胡瑞節妾王氏年二十夫故無子嫡旋亡氏矢志靡他乾隆四十年族惡胡占化計吞家產將奪而嫁之氏遂自盡撫憲海審實按律治占化罪嘉氏烈節特請旌表奉文建坊

劉才傑妻柯氏夫沒氏勺飲不入口者三日舅姑懼其死以湯灌之繼以肉糜氏不食跪而謝曰舅姑憐我然夫未殯而茹甘旨可乎易以粥乃食至七日夫葬卽自經死年二十有七

張修禮妻柯氏歸三年夫病篤氏捧藥泣曰妾命薄累君君若不起妾敢生耶及夫卒不食三日氣將絕姑勸諭之薄飲而蘇夫就歛設靈閭內每食必泣奠焉或以其年少無出徵示之意氏不語旣而歎曰死余志也天下分外相如之事惟死可以謝之遂自經時年二十二丁際盛妻柯氏年十八適丁二十九歲夫故數日不食幾斃及夫葬號哭焚香靈前入室自經而亡

洪尚訐妻程氏年二十四訐沒家極貧伯叔慮其難支遂奪其志氏聞夜具鷄饌與娣姒泣別次日娶者昇輿至氏詭言登樓更衣遂自經而死族姪立模爲傳以彰其節烈

計敦本妻張氏年二十歸一載無子夫故氏誓以身殉翁姑防守甚密且嗣伯氏子以慰之氏乃欣然若爲不死者然翁姑防守終不爲懈久之氏不得死遂託疾絕粒而亡年二十二

儒士高秉莊妻童氏年二十八生一子夫疾三載氏侍湯藥晝夜不倦後莊病益劇氏每夜禱神祈以身代迨莊將絕家人環聚號哭氏私人房中自縊而亡

顏程模妻吳氏模祖母族女也受顏聘養於顏性雍和善女工祖姑教愛尤至年十八合卺不踰年模故無出吳一疇幾絕葬後不出閨帷而神志常惘惘尊長內外咸慮之祖姑尤加防視甫暮防稍懈倚床自縊衣服端坐

面如生族戚咸嗟呀為之立後

業儒詹懋梧妻丁氏貢生世則女年二十八生一子甫四月而夫故氏獨棺號痛誓不欲生娣奴咸以撫孤勸之先是氏產後即侍夫疾日夜不懈舉兒付乳母至是夫卒欲自乳之常置兒於懷旋棄之終不與乳謂其娣奴曰人相依則相戀是兒可合其戀未亡人耶娣奴異其言疑之大加防檢凡刀劍繩索之屬概不存貯氏室氏不得死遂託言有鼠耗用菜餌覓鄰童買毒鼠丸數十粒吞之遂不食且嘔吐焉家人以為病氏堅不受醫而嘔吐愈甚久之血從口鼻出血中每有肉條識者以為腸斷家人始訪知其中毒鼠丸而已無救矣輟轉數日

而終氏奴高氏撫其子毓璿現應童子試

儒童王榮吾妻陶氏二十二歲樂故無子附殮誠信卜葬

周詳央伯出幼子繼夫祀夫喪終除服日不食而死

艾懷英妻駱氏夫故殉夫自縊時年四十四

劉良臣妻周氏年二十七夫故無出有勸以改醮者氏正

色曰婦人從一而終胡出此言耶叱之出號哭終夜遂

投水而死時人咸哀其志焉

朱繼增妻歐陽氏十七歲于歸奉舅姑和妯娌人無間言

又能以順事夫夫病三年日侍湯藥夫不下咽氏亦廢

餐夫病亟氏痛哭幾絕雖家人勸解痛不少衰惟舅姑

寬之則從容應曰為婦人無子可承夫祀又不能代夫

死罪不容誅言之涕潄潄下聞者亦泣迨夫氣絕舉家號慟氏竊入小寢緘髮鄉里至今弔焉

節

明

畢彥昇妻鄭氏鄭英長女年十八歸彥昇甫三月彥昇亡遺腹生子仲遠鄭養老撫幼紡績爲生始終不渝洪武中詔旌其門

庠生柯茂妻王氏王哲女善姆訓年十九歸柯三年而茂卒勤儉孝敬鞠育二女守志不渝年七十五卒茂從子庠生煥娶歐陽燧女年二十七而歿撫子曰瑄曰玉皆飮於庠貞節自矢年七十而終人稱柯門二節

程

綱妻王氏貢士王疇之妹適程年二十而夫亡鞠子友隆守節不渝卒年八十

李伯齡妻陳氏年二十于歸生子淑珍淑瓊越七年而夫亡以節自守

李淑瓊妻吳氏年二十于歸生子思麒夫亡同姑守志事之甚孝

宋永華妻歐陽氏教諭暹之女年十八于歸五年而寡撫子文淮文海清苦守節年七十五而終

王守邦妻陶氏年二十夫以暴疾卒陶哀毀欲與俱死會翁勸其子越宿亦亡陶嘆曰我卽死姑何倚乃營夫塚豫虛其右以誓同穴孀居二十餘年事姑盡孝內外稱

之

計 瑚妻王氏其節行詳何相國墓碑 見文錄

馮世亨妻柯氏年十七適亨六年亨卒柯哀毀甚以子天
寵方三歲忍死撫之父母慮居孀撫孤之難諷以改醮
柯正色以謝弗能屈也邑令曾賚以布帛柯謝不受曰
未亡人忍視息人間耳何敢邀非分之榮者學鄭公匾
其門曰貞節

舉人陶欽民妾江氏嫡徐生一女無子納江亦無子已而
欽民與徐偕亡江年二十哀毀幾死姑救復甦毀容垢
面縞衣蔬食奉姑撫女扃戶不出以紡績自給歲時饋
奠哀切聞者感傷凡五十餘年嘉靖間知縣周召具詳

奉旨旌表

庠生計如玉妻謝氏適玉年甫二十而玉卒始欲同死因
姑防衛得全乃誓靡他足不履外闕撫遺腹子成能食
饑邑庠已而成能又卒婦王氏哀痛嘔血觸地幾死與
姑同志共處一室朝夕相依時稱雙節隆慶間知縣許
根善以聞奉旨旌表

庠生田 疇妻柯氏年二十疇卒矢志守節營夫塚虛右
以待父母憐其年少無出欲奪之柯剪髮毀容誓死靡
他朝夕哀泣憤鬱成疾父母為求醫嘆曰得死為幸何
以醫為年三十二而卒

劉 淦妻黃氏名貞懿湖口黃釗女年十九適淦三年淦

卒生子价方一歲黃屏膏沐竭力事舅姑終身不履外
闕卒年七十有三侍御廣陵桑喬爲撰墓表

王 標妻計氏年十六適標事舅姑孝越八年標卒計哀
痛幾死復甦曰余從夫死足矣而老姑執事遺孤執撫
不更負王氏耶遂去容飾絕言笑矢志守貞嘉靖初知
縣曾棠具禮獎勵年八十終

何 煥妻劉氏字大節年十六適煥五載而夫亡劉以死
自誓無異志事舅姑孝謹家貧歲歉恒至匱乏而奉養
不衰生子曰東曰南教以詩書由歲貢任主簿年四十
九終長樂林民部山撰墓誌銘

歐陽鑾妻汪氏年十八適鑾鑾亡遺腹子春家貧紡績治

生春早夭仍撫二孫成立年八十終

計 緯妻王氏年二十四緯亡王哀泣成疾母迎醫視之
謝曰恨不速死以從吾夫何藥爲及緯葬有期王謂姑
曰幸少緩以俟同穴踰七月疾劇取袖中所藏夫容展
視數回嗚咽而卒

陶養化妻時氏家定山萬歷間建坊旌表今坊尙存

康生丁與祺妻陶氏閨養化女適丁一載夫故陶年十八
欲與俱死水漿不入口者數日其姑防衛累旬得不死
方祺臨沒見陶哀甚囑之曰赴死易耳守節難我二親
在堂汝善事之更能爲我立後無墜宗祀吾願足矣陶
終身凜其遺言益篤婦道撫祺兄庠生祚次子承祚守

節二十餘載兄弟伯叔鮮見其面卒以悼夫死時當途嘉其行各有表揚萬歷四十一年按院顧題請建坊前志失載今補入事見坊陰陶時雨紀

柯 孀妻黃氏年十九夫故遺腹生子垣堅守撫孤垣長娶嚴潤女未一載垣又故嚴年十六遺腹生子鍾復堅守撫之兩孀一孤相依爲命縣令謝魯周名尹厚雷時敏各賜匾示獎萬歷初葉朝榮開於學憲江題其門曰雙節

儒士王佳傅妻歐陽氏隨州牧歐陽剛之妹事姑孝夫亡氏年十八撫子朝用朝同紡績治生父母欲奪其志引針刺額以哭黔塗之深入膚裏里人稱爲黑顏節婦卒

葬十五都野鷄壠墓前後多產異木幽禽羣棲邑令白紹光奇其事爲文弔之作墓誌禁破伐以彰其節明書王錫節妻石氏家貧事姑孝夫喪年甫二十茹羹飲冰五十餘載躬勤紡績課子詩書邑令梁上其事直指將題請建坊石辭曰奉姑教子未亡人自盡職耳若欲建坊是沽名也因堅謝長子演元登

國朝丙戌賢書石年八十六卒

國朝

洪漢瑞妻彭氏年二十四夫故後四月誕子其任彭冰葉自甘撫孤成立享年八十九芝蘭盈砌孫岱齡登戊午賢書益苦節貞操之報

丁自宏妻阮氏年二十而孀上有老姑下無穉子阮矢志奉姑養則盡孝喪則盡禮以姪應甲承祧娶媳陶氏已而子媳偕亡復立姪應榜爲嗣禮佛持齋茹蔬終身年八十終

廩生朱時位妻張氏位髫年食餼夭折無嗣張年二十四伶仃孀守與一婢相依鬪族念其孤苦公議立姪功徽爲嗣以養其老年七十餘而終

歐陽耀德妻馮氏年十六于歸三載而孀遺孤數月上奉舅姑下撫嬰兒艱辛創業家道以亨子成立孫枝亦盛年七十餘而終

王奉命妻張氏方笄守節撫子心及成人婚娶心及復天

媳張氏亦矢志奉姑一門雙節

王演義妻謹氏歸王五年而寡誓死靡他父以年艾家貧強之嫁謹引刀斷髮曰兒頭可斷有如此髮矣頻歷兵荒艱辛萬狀守志不渝年九十六卒

陳時巡妻馮氏巡早卒馮生子于成節操凜然巡姪學斌亦早卒妻時氏感馮之貞亦矢志柏舟養子成立人稱陳門雙節

庠生馮漸光妻朱氏漸光精易預知死期謂朱曰今八月當與子永訣汝艾年可適人毋自苦也至期果死朱不
二志日供易於靈幃而哭撫遺腹子騰及於成立年八十卒

計汝暹妻劉氏于歸數載而廢事姑撫子操潔冰霜姑死伯奪其志劉截髮刎頸伯不敢強

庠生洪日亨妻江氏年二十二夫卒江砥志柏舟育孤仲先成人苦節四十餘載

洪濟世妻汪氏知夫家三世無昆弟勸夫納妾生子日新而其母死未暇盤濟世尋卒汪年二十五奉公姑育孤兒家計蕭條茹荼食蓼弗恤也已而日新又夭汪撫三孫成人享壽九十餘會元遠滕亦苦節之報

劉慎傑妻陳氏年二十九夫亡子賢甫三月陳養姑盡孝教子以義方所居通衢國初兵寇往來陳聞警輒避顛沛中以刃隨身義不受辱賢補弟子員陳之教也

庠生高琴月妻歐陽氏夫沒氏年二十三孝姑訓子操潔冰霜年七十而終

譙嘉典妻歐陽氏夫病刲股和藥卒不祿弟勸之嫁引刀截指以示靡他孝於翁姑撫二子成立次子斌入泮壽七十餘

汪應鑄妻丁氏早年夫喪中年子天媳亦孀守育孫長成苦節五十餘年壽八十而終

凌基元妻歐陽氏年二十一夫故誓不欲生姑曰婦有遺

孕宗祀爲重且二親何依乃止越七月子鍾繼始生撫

孤子奉舅姑歷五十年如一日姑嘗抱病年餘歐陽侍

湯藥不間刻暑幾致疾語其子曰爾父得祖父母歡心

不幸天歿我弗能事二親死何以見爾父於地下姑歿
盡哀三年惟茹素後翁以截選歿京師歐陽嚮產歸櫬
年七十乾隆十一年知縣李松泰請題 旌表建坊祀
節孝祠

洪自許妻歐陽氏性貞靜通女史年十八字許許善文氏
殷勤佐讀相敬如賓越四載而許故將大歿氏操刀刺
面嚙棺而泣曰鬼神有知相期泉壤血流滂然姑曾氏
拭淚謂曰若何至此氏曰媳少年不幸早寡恐未見諒
以此自誓耳聞者莫不感愴于時子尙義甫二歲育於
內室未嘗出戶遂終身不聽絲竹不與燕席且訓子有
義方邑合李松泰題其行爲請建坊祀節孝祠

朱昌邦妻丁氏康熙戊寅于歸壬午夫故年甫二十四氏
以遺孕在身姑病臥榻勉強不死泣血奉夫殯葬慇懃
侍姑湯藥越六月生子啓睿撫養成立完娶產二女而
子亦亡氏復養兩弱質荆布遺嫁茹荼五十載乾隆戊
辰邑合李松泰詳請建坊至壬申卒祀節孝祠

項秉芳妻汪氏性孝謹年十八適項國載喪所天生子承
源甫月餘氏呼天搶地欲以身殉孀姑抱兒痛哭云爾
獨不念白髮之姑待哺之子三世一身乎始強活以仰
事俯畜爲己任守貞五十餘年幽靜閑默戶外不聞言
笑聲乾隆丙寅縣令以氏節孝詳請建坊 旌表入節
孝祠

生員柯在揚妻屠氏豐城人幼通書史知禮節嫻婦道年二十適柯越三年夫故遺一女貧難自給氏茹苦食荼堅心守節女工之餘則以小學列女傳訓誨其子女嫁立姪欽悅爲嗣年六十知縣李松泰詳請建坊旌表

祀節孝祠

以上已奉

旌表

生員馮騰孫妻歐陽氏性貞靜年二十適馮越八年夫殞氏欲捐生以殉母以親老子幼再三勸諭氏勉起治喪俱如禮制撫三子婚娶教誨備極艱辛年臻八十闔閭不踰雖同居罕聞言笑聲遇大宴會猶閉戶飲泣其守禮老而不懈如此太守蔡學灝給以節比松筠匾額五世一堂卒年九十六歲

周家械妻柯氏械死氏年二十三生一子尚幼家業蕭條氏紡績營生奉翁姑無缺禮撫孤兒以義方太守朱儼聞其事旌以節比松筠匾額

歐陽初式妻劉氏賦性貞靜嫻於內則年二十四夫故家非素封氏堅志守節奉公姑撫穉子茹苦歷數十餘年每逢夫忌辰必設主痛哭雖老猶然壽九十有二

余大柱妻計氏性慈孝康熙辛丑柱輓漕糧次德州病故氏年二十六聞訃悶絕繼念孀姑在堂子有班孤立因不死治家嚴肅訓導有方子孫叠叠亦徵節孝之光

柯在振妻饒氏嫁四載夫故家貧舅姑老無伯叔猶子之依惟一女數齡而已氏仰事俯畜艱辛獨任及去嫁舅

姑葬已勞瘝致疾不起矣女以藥進麾之曰吾事幸畢生復何爲惟命潔治衾衾以俟瞑坐數日而終

庠生歐陽丞妻汪氏無出又娶許氏生子驍越數年丞故二氏年方青春同撫孤子延師課讀誓期成立家素裕性好施與康熙丙申大荒氏捐穀賑饑被惠者衆子驍乙卯登鄉試都督府苗國琮旌汪以柏林晚翠都察院胡定旌許以今之歐母人以一門雙節稱之

歐陽樅妻周氏賦性孝年二十歸樅奉翁姑內外無間姑歿哀毀骨立二十五樅病侍湯藥衣不解帶者月餘日夕禱天求以身代樅卒舅年七十奉養尤謹子旂甫週延師課讀有畫荻風後旂入太學尤兢兢訓以義方未幾旂復歿惟與婦媼潘氏苦節共勵里族哀之

汪源起妻朱氏歸汪甫半載夫病侍湯藥月餘衣不解帶夫死誓以身殉念有遺腹不果越五月生子澤遠家貧紡績終夜不輟翁姑憐其年少令之自便氏泣曰翁姑所慮者貧耳媳當以女紅資奉甘旨及姑病劇禱天請代甘貧耐苦里族賢之

馮騰雍妻陶氏年十六于歸事舅姑備極孝養不數年舅與夫繼逝氏年僅十九遺腹生子萬奎姑得奇疾偃臥床褥展轉需人氏臥姑榻周旋十餘年始終如一年八十二終

余大宏妻朱氏生子有與夫死氏決志磨笄尋念孀姑弱

子浣席無資勉起治喪時值水旱山寇蠕動氏奉衰姑
鞠穉子處險如夷守節三十六年而歿

生員汪衍妻何氏年十九適汪生子不育越七年夫故觸
枉幾死姑泣曰吾子死爾又死我將何依氏乃忍痛爲
養姑計立姪志淵爲嗣視猶己出七十五歲壽終

汪源棟妻田氏年十九適源棟越五年夫亡迫欲自裁因
子茂尚屬嬰兒勉從姑命治喪殯葬如禮終身縞素不
與宴會每遇夫忌辰必痛哭流涕歷四十三年未嘗少
渝壽六十有九

歐陽重瀛妻曾氏年十七于歸二十一夫故比欲死殉念
孀姑孤穉無依隱忍作未亡人勤紡績以給衣食卒無

怨言壽八十郡守吳贈以閭閻流芳

生員孫日凱妻萬氏慟夫早亡塗面截髮飲泣強生及終

喪後家漸蕭條氏獨力支持教子課孫卒能振起家聲

生員凌基祐妻歐陽氏幼嫻閨範年二十六夫亡生子俊

方週氏卽欲以身殉之因念兩世一身恐祀將斬強生

撫孤慈嚴交至姆儀淑德不媿名媛現年八十有三

生員劉大鶴妻凌氏適劉四載夫卒生子倫一三歲氏守

節撫孤歷三十餘年清風可挹家世屯籍衛務紛繁子

弱冠復死斃一孫幾難自立氏苦力經營撐持門戶
人以女中丈夫稱之

畢煥蘊妻朱氏蘊早喪氏二十一歲遇姪悍逼家業蕭條

氏仰事俯畜艱辛遍歷誓死不移教子增紹以義方增紹亦克敦母訓不墜先緒邑令劉進嘗撰墓銘以誌其事後孫銓福登庚午賢書銓祿甲午府歲貢人稱節孝之報

葉中琳妻張氏于歸六載中琳故時舅姑已老一子向朝尚在襁褓氏脫去簪珥總持家政奉舅姑撫孤子艱辛逼歷苦節彌貞邑令陳夢盛劉進廉其賢錫以匾額

高寶仁妻畢氏庶室胡氏早年二十胡年十七而寶仁故同矢柏舟養姪坤爲子撫教成立畢享年九十胡享年七十有三署府夏景棠旌以瑤池冰雪匾額

生員柯在選妻歐陽氏年十八字柯舉一子欽詔二十三

歲夫逝嚙棺欲以身殉翁姑知有遺腹勸之始解閨數月又舉子廷譜後欽詔故媳歐陽氏年方廿齡亦閉門飲泣誓不二天姑哀其志令讚子得招承詔祀姑媳同棲一幃始終不渝邑令王廷筠旌以雙發冰操匾額

計大敷妻何氏年二十四夫亡遺腹三月生子應續家屢空氏念宗嗣大計茹荼鞠育稍長誠讀先人遺書其子遂成端士氏自夫故哀毀身瘁三十七齡而終鄉人咸嗟嘆之

曾從勉妻歐陽氏二十七歲孀生二子天達天迺未晬從勉下世氏傷夫臨終以不獲終養爲恨事舅姑備極孝謹嘗訓二子曰汝兄弟能善事祖父母以慰汝父心則

我死瞑目矣後一家雍穆人以爲母教所感

饒萬春妻方氏萬春少負氣概志早喪氏傷夫志未伸

茹苦操作三十餘年每訓二孤必涕泣勗以無忘父志

且周恤貧困卒無德色族黨有賢淑之聲

張嘉偉妻何氏年二十七俸故二子幼公姑旋沒家產就

耗氏泣曰我忍舍此兩塊肉而負死者乎辛苦萬狀以

撫二子甫成立又雙亡里族咸爲痛恨焉

生員陳學遜妻方氏遜沒氏年二十二痛身無出泣謂伯

叔曰忍使我夫無後乎爰立姪日翥承祧親爲鞠育之

計適死後氏親理喪葬者九因積勞致疾卒年五十四

陳日蕃妻石氏年二十四歲夫故一子瀟幼家徒四壁苦

志守節撫教孤子卒以成名里族賢之現年六十有二

鄧憲純妻史氏年二十字純克盡婦道純病氏侍湯藥日

夜焚祝願以身代數載純卒氏年二十六生一子尙在

襁褓堅志撫孤敬奉二老備極辛勤至死不懈

汪鑑賢妻高氏年十五適賢十八守節撫一藐孤未幾子

沒高痛夫乏嗣爲立姪以繼宗祀歷節四十餘載現年

六十有三

凌基申妻汪氏年二十六基申遊學撫州去不返子又旋

亡迨五年後見叔生子鍾任氏卽請於舅姑立以爲嗣

撫養教訓如同已出自基申去後縞素自甘遇大宴會

吞聲飲泣至老不渝

曹淑瑜妻汪氏瑜卒氏年二十四痛身無出立姪爲嗣視
若己子越十餘年繼嗣亦沒媳汪氏感姑節義同矢冰
霜人以爲一門雙節

劉煥儒妻歐陽氏年甫二十二夫故家貧誓不再嫁刻意
茹荼課孤子約向以謹愍子尋逝媳趙氏亦矢志樵舟
同撫遺孫世則世法成立邑令李旌以節堅冰霜

丁 炯妻歐陽氏年二十于歸炯於己亥縣試冠軍旋即

病故氏年二十六子乘時方懷抱痛夫名未立堅志撫
教成名忍飢寒勤紡績苦節三十餘年現年六十三

張曰坤妻操氏曰萬妻陳氏同歲于歸操年二十一生子
時文方數月而曰坤死陳年十九曰萬亦死兩人共撫

一孤誓死不變出入起居咸與之俱人稱桃源雙節
危思選妻劉氏年二十五夫故姑年耄子甫三歲仰事俯
畜艱辛備嘗年七十而沒

易 發妻饒氏二十四歲喪所天卽欲自殞因姑勸忍死
撫孤艱辛備歷且善執婦道姑老以冢婦代理家政垂
三十餘年內外帖然無間壽八十六

生員張京昌妻同氏昌早逝生二子相繼亡舅姑老聽氏
自裁氏矢志靡他託尊承繼讀書婚配以紡績資之舅
姑歿殯葬一以禮年七十六而終

魏昭華妻劉氏年十七于歸越三歲夫疾革泣謂氏曰我
父母老弟幼女方孩我死汝善視之氏悲咽不能答華

歿氏忍痛孝事舅姑育孤女越十餘年舅姑卒夫弟夫
婦皆亡遺子數歲氏撫畜之如己子邑令劉進旌以節
孝可風匾額

生員高士福妻張氏年二十八夫故號泣幾斃矢志自守
撫二孤皆成名長子生員欽題旋殞妻朱氏年二十七
與張相依守制內外肅如人稱高氏兩世未墜之緒於
張朱二人有賴焉

生員高洪家妻朱氏年二十七夫抱疾累月不瘳氏早夜
調護衣不解帶迄夫卒氏曰未亡人安忍獨生奈三孤
方幼非我誰撫苦志五十餘年始終不渝邑令劉進旌
以玉潔冰清匾額

汪在次妻譔氏年二十夫故矢志撫孤編素自甘宴會不
與苦節五十餘年

周九棘妻皮氏年十九子歸二十七夫亡家計蕭條氏躬
自操作孝以奉姑嚴以訓子苦節二十餘載後家小裕
而氏遂歿里人咸嘆惜之

生員陳綱傳妻段氏年十九適陳二十四歲綱傳將終謂
氏曰吾家窘甚爾毋自苦氏涕泣不能成聲惟指天誓
曰婦不能從一以終者天擊之汲水負薪以養翁姑境
愈苦而節愈勁享年七十而終

饒朝舉妻汪氏年二十二夫故遺腹生子廷訓時舅已沒
奉孀姑以孝稱姑隨亡依叔朝托又不幸早世與孀朱

氏冰蘖共勵各撫一孤零丁孤苦歷三十餘年

扶萬嶽妻饑氏嶽早故無子氏悲號幾絕因有遺腹忍死
俟之越三月生子朝徵遂輟哭恐傷姑心然孤燈紡績
未嘗不悽然淚下也今子幸克家人以爲苦志之報壽
七十有六

廩生王學妻袁氏年十九于歸鷄鳴戒旦冀夫大成不
幸甫六載夫故一子星福方數齡撫育成人又短折僅
遺一孫兩世孤苦一身獨任族黨翕然稱賢

饒啓梓妻方氏于歸二載啓梓故遺腹生子朝搗氏守節
撫孤二十年搗甫受室復天折今與媳郭氏相守以老
壽六十一歲

歐陽樑之妻曹氏年二十四夫亡無子撫姪恪爲嗣鞠育
不啻所生操持家政動遵禮法歷久不衰現年五十有
八

項秉芬妻柯氏年十九適項越二歲夫故子方月餘氏以
紡績爲生事孀姑備極孝養卒年六十三歲

項師造妻汪氏年十九夫故遺孕生子秉莪時有謀欲娶
氏者氏毀容剪髮懷刀自隨謀遂寢辟繡教子學成又
故撫二孫承悅承怡俱成名督學李鍾僑旌以玉節傳
芳

艾欽鶴妻袁氏年十七于歸二十一夫故遺孤二歲矢志
堅貞奉事舅姑孝養無間青春守節白首完操邑人賢

之

凌鍾彝妻王氏年二十二葬病卒子汝兆方數月氏堅心守節勤勵女工撫子成立邑令李松泰以貞潔堪旌褒之

凌基溥妻柯氏將嫁夫抱血症甚篤旁議阻之氏泣謝曰禍福命也烏可棄義而逃之及歸謝絕鉛華躬親湯藥毫無愠色半載夫故公姑憐其志立姪鍾朗爲嗣恩勤如自己出族人稱之

生員羅邦佐妻汪氏適羅五載生子二長三歲幼未週邦佐病故氏年僅二十四家貧只如洗翁姑垂髫氏矢志靡他假縫紉供菽水勤紡績佐以熊丸子職父道一身兼之

現年七十猶勤勞不倦

程曰祐妻朱氏于歸半載夫沾山瘋瘧重疴氏親湯藥衣不解帶夫亡矢志柏舟撫孤繼古課讀成名

江之柏妻柯氏年十七適柏二十四柏故編衣素食奉姑撫孤不以貧苦易志現年五十有九

凌基賀妻余氏性嚴毅知禮節歸凌三載生子鍾嶺甫週基賀故氏青年矢志白首完操四十餘年艱苦備歷鄉里咸尊敬之

汪大恒妻歐陽氏年十九于歸越五年夫故比欲相從地
下因二孤年弱無依恐墜夫祀甘貧撫育教讀完婚備
嘗艱辛享年七十有三

朱爲達妻劉氏年十八嬪朱二十七夫故氏痛幾死孤方幼穉隱忍就活親乏期功糧無隔宿紡績治絲度日艱苦三十餘年

宋善淑妻周氏淑幼失怙喜遊俠家業中落又早世母老子存詩幼氏誓以死守身親操作不憚艱辛奉孀姑甘旨不缺又以餘貲延師課子頗有陶母之風

歐陽近光妻李氏年十八歸光越四年光卒氏上奉姑下撫子歷數十載膏沐不施宴會不赴有冰清玉潔之操生員劉賢妻朱氏二十五賢死與孀姑陳氏相依守志撫子文登成立娶王氏文登繼殞王年二十六遺子章選龍俱幼三世伶仃一門荼苦知縣劉進旌以懿德繼

新區額

丁自衡妻王氏年二十五夫故遺孤應景年幼時有利其貴者欲奪其志氏備刀自隨誓以死守勵志訓子邑令吳士宏贈以操玉和熊匾額卒年七十二

朱爲功妻汪氏年二十九爲功卒子二調邦七歲殿邦甫生汪矢志守節備歷艱辛教孤子養舅姑孝慈兼盡知縣劉進旌以節孝流芳匾額

袁玉現妻朱氏年十八于歸十九夫故氏哀號幾絕閱數月遺腹生男喜曰吾夫有後矣家無數畝之產勤紡績以奉舅姑育孤子自甘澆泊雖縞衣蔬食無怨言邑令喻良旌以節壽兼隆匾額

歐陽驥繼室張氏子歸一載而夫故公姑繼亡撫養前子
幾難自存氏奮然曰女子之道從一而終誓不再字及
老子又亡家計益窘力鋤自膳鄉里莫不賢之現年七
十有二

詹演元妻孫氏性貞靜甘澁樸適詹一載年甫十六演元
故氏從死者再姑勸強起治喪家窘有以異志相探者
氏曰此禽獸之行毋以污我紡績灌園奉姑菽水苦節
五十餘年壽七十有五

張萬騎妻曾氏萬騎卒家徒四壁矢志自守薪水率皆自
給苦節六十年現年八十有二

丁 球妻王氏球幼慧善文早卒遺孤振興氏年二十三

念夫無兄弟而舅姑又老遂忍死守節肅居一室資紡
績養二老教子成名以續父志現年六十有一

王雲龍妻時氏雲龍學成早逝僅遺二女時年二十立姪
欽華以續夫祀無何欽華又故媳曹氏無出途相棲一
室共矢冰霜曹卒年六十時卒年八十有五

柯秉奇妻單氏年二十六作未亡人甘貧守貞菽水奉姑
義方訓子現年六十

時鍾仁妻劉氏夫故家極貧苦節五十餘年饑寒交迫卒
無異志現年七十有五

時鍾華妻何氏年二十四夫故家貧紡績度活撫子成立
歿年六十有一

會昌景妻朱氏年十八夫故水漿不入口者數日念姑老無依復強起後七月遺腹生子家極貧嘗鋤蕨碎指姑泣曰吾不忍爾之苦若何對曰媿以奉姑育子苦亦甘矣始終如一壽九十三

宋善成妻程氏年十八適宋二十二夫亡絕華飾甘淡素與姑朝夕相依姑亡操守愈固數十年不作笑語聲現年六十

饒萬祿妻張氏性幽靜寡言笑子歸四載喪所天無子女舅姑又皆卽世氏誓不再醮蓬首垢面薪水一以自任父母憐其苦喻以改志卒不許鄉里賢之

王宗聖妻方氏年二十二夫亡一子甫數月貧苦勵志盡

孤教諭彭演贈以柏舟勁節卒年七十三歲宗聖弟宗政妻彭氏二十二歲夫故家屢空矢志靡他自一女嫁後家計愈迫從姪太學生文美時周之壽七十二

朱昌梅妻汪氏年二十于歸二十八夫故長子萬論甫二歲越二月遺腹生子萬誘家極貧鋤山負薪忍饑撫子子長倩工養母一家節孝鄉人賢之

劉伯爾妻馮氏年十八適劉未葺夫歿姑亦繼亡翁年七十餘以重憂致病氏潛割股和藥翁賴以痊遺腹生子正乾家貧奉翁撫子冰操愈堅邑令端木象謙賜以節孝女英匾額

柯在岱妻劉氏二十二歲夫故生子欽俊甫三月矢志柏

舟事公姑孝教兒以禮年六十邑令李松泰旌以節高松永匾額

張超民妻何氏生子不育年二十二夫卒矢志守節去容飾絕言笑事舅姑孝謹鄉里莫不稱焉現年六十有二生員李長節妻魏氏生子之昌之泰二十四歲而寡孝事二老慈撫兩稚勵節終身人無間言享壽八十有二邑令李祖旦旌以勁節不彫匾額

汪文謨妻歐陽氏年二十七夫故撫孤起遠娶媳高氏生子未週遠又病故姑媳相依冀孤成立以延宗祀甫三歲復天折陽與高零丁孤苦同矢柏舟縞衣素食者數十年如一日

王煥芹妻張氏年二十二夫亡泣欲身殉念有遺孕強起治喪月餘產子士寬氏堅志撫字及寬成立登舉九男邑令李松泰賜以鶴髮冰操匾額

王煥釋妻何氏年二十六夫故甘貧撫孤不幸孤又天折僅遺一孫二齡氏備嘗艱苦勤加撫字得不斬王氏後一身肩三世至老猶勤勞不倦歿年六十有五

凌基春妻計氏年二十五夫故叔幼不能理家政氏勤紡績奉姑甘旨繼姪為嗣愛同己出數十年不妄言苟笑雖家貧子姪輩行必別途現年六十有五其白首全操

如此

余有琮妻計氏年十八適余生二子有琮亡氏堅志守貞

撫子成立次子又故媳王氏亦效姑志冰雪共矢一門
雙節鄉里仰之

鄔時濟妻洪氏濟早卒誓以死殉因姑老子幼忍之姑嘗
試其志曰居孀難曷改醮洪卽觸柱裂額血流被面姑
救乃免邑人王化嘉其志贈以翠柏歌邑令王廷筠榜
其室曰翠柏風清

王欽榮妻高氏年二十二夫亡上無公姑中鮮伯叔家貧
幾難自持有勸之再醮者氏引刀自誓曰呌吾嫁惟斷
此頭耳遂毀容閨居紡績度活撫二孤皆成名現年七
十有八

侯廷貞妻朱氏年十七于歸二十四夫故誓死靡他孝以

奉姑義以訓子苦節數十載邑令陳夢盛旌以敬姜遺
範郡守王眉穀以松筠比節四字褒之

時興華妻王氏年二十三夫亡矢以身殉翁姑泣曰吾二
人老矣爾雖無子一女甫週爾死一門老幼何依氏因
強生仰事俯畜無資造紙錠勤紡績以給食後孤女嫁
二老以天年終鄉里稱之

朱之啓妻計氏年十七歸朱十九夫故身無出矢志靡他
操井臼供菽水迨翁姑亡殯葬如禮且破家產歷修祖
塋置田備祭皆丈夫所難爲者年九十而終

畢煥荆妻歐陽氏年二十五夫死無子投繯幾斃荆兄煥
蓄以己子嗣之閉戶自守訓子宏就學苦節清操四十

餘年始終如一

生員柯欽謚妻歐陽氏年十九適柯二十四而寡因遺腹不克身殉越數月產子堅心撫育事姑以孝聞家愈窘勤勞愈力孫儀瑞補郡增生咸以爲苦節之報

歐陽兆璵妻皮氏年二十夫故甘貧守節上事翁姑下撫子女勞苦靡寧越二載翁喪姑哭之慟兩目失明氏周旋益謹姑死喪葬如禮署郡夏景棠旌以柏操霜清匾額

張嘉相妻魏氏年二十適張越六年而寡夫將終囑氏曰吾家貧無嗣汝年少莫若他適氏指腹號泣語不成聲踰月生子士典堅心撫育己而翁姑繼亡殯葬皆氏經

理可謂苦節完操現年七十五

柯枝蔚妻鄧氏年二十四夫死冰霜自勵奉姑撫穉不憚艱辛郡伯朱儼贈以柏幹松筠匾額

周濟通妻魏氏年十九于歸生子法方二歲濟通下世家無磨田半畝氏冰霜自勵勤紡績甘淡薄上奉舅姑下撫孤兒清操四十九年

張培杜妻歐陽氏年十八于歸奉舅姑克盡婦道甫七載培杜故氏堅志撫孤又天折筑筑孤苦歷五十餘年邑令李贈以清月常輝匾額

增生會宏儀妻計氏儀死氏年二十四以額觸地血流幾死母勸之起治喪撫二子以慈奉公姑以孝邑令陳以

敬姜遺範郡守朱以巾幘鬚眉額旌之

生員徐 試妻高氏年二十七而發遺孤顯方數齡氏矢志撫孤稍長延師課讀先緒賴以不墜鄉人共稱其賢柯秉吳妻王氏年十九子歸二十四而寡生二子長四歲次二歲時舅姑已老氏紡績供甘旨生事死葬一如禮制訓二孤以義方完貞六十餘年巡撫白旌以操同冰雪匾額

監生劉 學妻汪氏二十四歲喪所天一孤甫週歲氏親身操作以女工代男工孝養舅姑以婦職兼子職茹荼飲冰誓死靡他邑令王廷筠贈有節紹九姑匾額

汪開大妻歐陽氏年二十五夫卒絕食五日幾死家人以

撫孤泣勸勉就食恁伯數十年耐苦忍忿終伯世未柝
癸子傳因得事舉子業氏生平肅閭儀雖子姪輩言不
踰閭親隣宴會至老不與卒年七十三

頤兆備妻童氏年二十五而寡初夫病時謂童曰吾親老子弱苦無先業設不起將若何氏哽咽不能言及沒家人憐其少而貧欲嫁之氏曰吾將從夫於穴也但遺言在耳死且不能終夫事尙忍背其老親幼子以去哉已而姑死於姑做器內拾遺金獻諸伯以治喪事教子更嚴而有法鄰里稱之

劉惠蘭妻方氏方慶雲之女也年十八歸劉甫一月夫故上無公姑下乏子媳堅貞自守之死靡他因劉伯叔多

難避歸母家與寡嫂沈相依歷四十餘年不妄言苟笑
以紡績織紉自膳餘貲建雪心橋以利往來

郡庠生喻萬統妻陳氏萬統死氏年二十五矢志守貞不
爲容飾事舅姑以孝謹教二子以義方壽終七十邑令
沈大綬撰碑銘表其墓

彭再儀妻陳氏于歸二載再儀故氏抱踰月之孤撫字教
訓恩不掩義總持家政內外肅然壽終七十六

劉顯棠妻歐陽氏于歸數載顯棠故無子女氏衣縞茹素
祖遺田產量收租以給衣食餘悉分伯叔顯棠在日所
蓄餘貲亦盡捐以建橋修路買舟濟涉曰未亡人旦夕
從良人地下無須此也鄉人欽其節又頌其惠

凌應本妻陳氏年十五于歸卽嫺婦道夫故年二十二家
人憐其年少無依諷之改醮氏以死拒之苦志四十餘
年惟以紡績自給一日具酒食往奠夫墓歸遂不食囑
同室曰我死慎勿假手男子以污我越數日終

劉文潮妻曹氏年二十六文潮亡子亦旋卒以姪繼嗣又
亡家極貧奉姑二十餘年伶仃孤苦始終如一郡守安
公以松堅柏操旌之

楊洪齋妻馮氏年二十六夫故縞衣素食以紡績自給撫
子元太貞太元娶張氏甫七載而元卒父母憐其年少
無出合改醮張正色曰我去姑何托叔何依再有異言
惟一死耳及貞長娶費氏生子仁貞又卒費哀呼吐血

幾絕與姑妯相依茹苦課兒郡伯蔡學顥贈有奉姑撫
姪志同堅一片冰霜與世傳之句張亦嘗自咏詩曰髮
封念四春苦苦守楊門節矢志告穹蒼早與良人訣又屬
纈時詩有三發居一室撫孤如掌珍紡績忘夜永課兒
不計貧等句馮八十七張七十四費五十九俱完節以
壽終人稱楊門三節

楊洪亮妻高氏年十八于歸事舅姑曲盡其意生子越泰
赴泰二十九夫故後二子復相繼亡遺孫本德本性氏
身肩兩世重任淚揮孤燈艱辛萬狀郡守蔡學顥贈以
志堅金石匾額年八十二以壽終

劉煥鳳妻張氏青年夫故遺子任氏柏舟自誓上奉公姑

下撫孤兒清操至死不渝

馮之鳳妻劉氏年十八于歸二十六而寡去飾毀容上事
老姑下撫孤子備歷艱辛誓死不移長子若笙娶汪氏
年二十一若笙下世子懋念娶凌氏懋念復短折女適
歐陽維獻獻又早逝汪與一媳一女同居一室共勵冰
霜邑令李祖旦廉知其事嘆曰姑媳雙貞一門節孝洵
堪風世焉

歐陽通妻劉氏年十八于歸奉老病舅姑備極孝養二十
四歲夫以暴疾卒即欲從死氏父曉以大義因忍死撫
孤鑑典甫娶媳洪氏鑑典又逝姑媳共撫一孫劉涕泣
曰吾夫勤勞立家將以垂後今三世一身何患無財因

捐貨建永濟橋一座又捐田地一庄續成汪家義渡其
好善樂施又如此

曾特書妻徐氏二十歲于歸奉姑禮意兼至四載夫歿欲
死以殉念姑日薄西山無人可托遺孤在腹冀延夫祀
遂忍淚就活族里咸欽之

程明妻歐陽氏年十八歸程事舅姑不拂其志二十四
歲夫亡呱呱在抱慘痛幾絕恐添二老悲復勉強治事
苦志清操數十年如一日

王煥倫妻劉氏于歸兩載夫亡家徒壁立事上撫孤不以
貧窶易志子增昇復早逝媳韓氏年二十八諸孤尙幼
姑媳相依辛勤自給

生員劉萬玉妻王氏秉性幽靜年二十三適劉四載夫故
比觸柱幾死蓬首垢面作五十年未亡人奉姑孝教子
世乾早年入泮又屢捐費周急族人德之

柯欽仁妻李氏二十二歲夫故時翁姑年老遺二孤甫數
齡氏曰我不可使化者抱恨九泉奉高堂生事死葬一
以禮撫二孤家雖貧必延師課讀其克成夫志如此

時應李妻葛氏年十八于歸七載夫故孀姑老一女幼家
貧勤紡績姑不缺甘旨女荆布遺嫁苦志完操四十年
如一日

黃洪業妻魏氏年十八歸黃二十五夫殞氏念堂上姑老
下兒穉一死不足塞責躬親操作奉姑育子茹苦三

十餘年邑令王旌以節孝匾額

汪在是妻洪氏年十九寡欲以死殉舅姑力勸乃止生一子鞠育成人可掇五十餘年自奉最薄待舅姑始終以禮前太守朱儼贈節履堅冰匾額

陳東閩妻饒氏年二十四夫故家貧無子舅姑老氏立姪續夫後紡績奉甘旨年六十有二猶勤勞不倦

生員歐陽臺妻時氏年二十于歸越四年夫故二子俱在抱氏泣曰公姑老子少不鏤金鍊石心者何面目見亡人於九原歷三十餘年紡績課孤守身如處子族黨欽之

諶榮緒妻汪氏年十八歸諶越七載夫故家貧幾欲自裁

因念上有垂白之翁下僅伶仃之子堅志完操仰事俯畜孝慈備至苦節四十餘年壽七十二終

諶榮植妻段氏年二十三而寡撫一子煥得艱苦備嘗煥得娶媳王氏甫二載段即病故煥得旋卒王年念五送二喪殯葬如禮鞠二孤教讀完婚艱辛萬狀人咸憐曰姑媳雙節王苦尤甚現年六十有一

生員陶克勤妻袁氏年二十歸陶二十五夫故袁撫弱子漢經訓以長厚敬事舅姑甚得歡心及舅姑卒喪葬盡禮守節三十餘年現年六十有一

陶唐恒妻魏氏適陶一載夫得疾氏奉湯藥日夕周旋不辦夫歿家極貧堅志守節勤苦撫子支持數十載玉潔

木象謙以醫髮成孤旌之

幼氏柏舟自矢奉上教下恩禮曲盡清

操自勵內外肅然壽六十五
十三

魏立任妻胡氏年二十六夫故苦撫二子貞操不渝

舊志

彭澤縣志卷之十終

